


居諸二集卷二

江東梅守箕季豹父



孫梅士秀君實編校

五言古

附四言古

詠懷詩

索處無適懷羣居興患尤素交夙已盡闐闐起
相仇甘醴善逆人變化若雲浮同心託蕭艾終
始寧為謀異種辯苗莠一器戒薰蕕匿怨而友
人見鄙于左丘信哉朱穆言獲我心所求

其二

飲酒始以治卒與亂相期枳橘有本性速化胡
爲茲驟雨不終夕象恭難久持揚渭時作清焉
能常不移墨氏悲染絲素質猶未虧

其三

澤畔生蘭蕙中堂生負苞植性各自固何必同
根苗高林注蠹房弱莖寄危巢末路尚傾側至
性日以澆九畹滋蒿萊百晦叢菅蕭

其四

葉公好似龍當見失其貞司原寶艾豸得之以
聞聲十襲閔燕石三刖報連城世道尚先容枯
木常得陳亦有夜光璧按劍起無因習巧擅一
時虛名善溺人介推讓封邑隱矣焉用文

其五

貧辱苦不泰富盛良亦難買臣行負薪同室相
弃捐陶朱致不貲妻妾胡悲憐蚤食固有待象
齒寧獨全寢丘寔已豐明者知其然饑餐首陽
蕨渴飲清冷泉

其六

齒牙比晉亂口舌敗聖謀陽虎遇仲尼却行亦
汗流好言寧可庸野葛不可羞護巧能爍金火
熾金故囚桮酌有鴆毒曜燕懷禍尤陽僭乃生
妖毀折良所繇君子遠倭人終以承天休

雜詩

憐極始成妒愛至怨乃滋隨珠與和璧對面有
嫌疑駢服寡全足二美難爲姿孤征常得朋比
孚變睽離掩耳適師曠障袂過西施

其二

隘塗無逸足濁水寡修鱗歲月奔走間漸與世
俗親幽意日以薄名實代相賓杜門謝故交開
門延貴人

其三

枳橘不同根地氣浸滌之故質一以化流轉焉
可知易牙察水性楊朱哭路岐清塵飛濁路誰
能辯參差亭亭松栢姿千歲無改移

其四

世德薄素修立論尚不經周官既已遠漢策莫
復陳思皇彼多士制舉來紛紛招卑易爲倖童
豎將用賓奔趨下成澤清譽誰能更肉食固多
鄙蓬蒿亦無人顧瞻京邑間平路起惡氛所以
申徒子抱石弃埃塵

其五

理裝朝出門壯色似盈車畿南滯淫久始願不
相如積瘁乃成厲客邪爲患虞衛絡生不祥疴
作偃衾襦信宿廢饗殮藥物薦中厨疲曳起振

衣恍惚帶有餘氣短心累却夜夢歸里閭夷外
固思反因風訊來書視此廓落意孤旅難獨居

其六

輕舟東南來似有鄉里人招搖相問訊果有故
所親安否復何如中意始覺平客思殊倉皇客
路又艱辛虛徐信占卜夢寐常惕驚夜久步踟
躕遙念率已更蕭瑟起長望羈旅難爲情

其七

曾參當在庭一宿常不違如何漫游子罷策猶

未歸怯怯在道塗窮巷音問希結念紆中曲展
側良已疲願託蕭蕭羽臨風起高飛

其八

所記爲別時注目不成言欲却復似匿意深難
自前指喻寧匪它已事卽歸旋如何當整御中
路逢沛顛初意旣不適還期又已愆身在逆旅
中疾疢相與淹空房臨夜鏡望舒當再圓屬夢
通我神神搖形不連涼露警單衣秋氣蕭庭蘭
似茲兒女仁弧矢應弃捐

其九

晨風與候鴈羽翮本相乘候鴈接緒颺群駕方
已升晨風在卑枝不得借援因天衢廣以邁豈
若要路津並馭礙高足求友耻同聲南箕知自
揚北斗懷獨斟歷甘忘已缺蟹筐不待盈執隨
非所貴何天不可行

其十

歷歷都城中冠蓋羅道周五步有光輝十里若
雲浮賢達固自直容止信已脩順軌易爲趨焉

知非驪駟艱澁有甘荼逸豫無拙鳩所嗟人生
事會命兩不錄

其十一

世迷道逾塞人情大不然日中幽沫生巧僧者
爲賢當津策蹇足競步寧見先色笑出市口刺
繡將誰妍自無逢年術無爲貴膏田去去勿復
道默默守吾玄

其十二

月令何乖錯寒暑旦莫間新衣不及縫舊衣不
暫捐倏忽風候異裘葛一時遷客子多苦心無
衣將歲寒岐路少永日窘側誰相寬徒倚如有
望對食或忘餐市酒似茶毒沈飲亦復難明燈
坐終宵鬱鬱傷肺肝

離思

上客日莫矣美人欲何之淇上不相送江臯空
復期月鏡殘生魄山翠愁沾眉霜下種護草焉
用寬別離

其二

霜降苦寒月日沒江南陰春芳掩秋序夕瑟忘
朝音離夢年年作空房夜夜深東流已遙邁無
因寄我心

其三

徂夜子爲別江干我出宿蛛絲縈在目亂水當
心曲霜葉太蕭索風船無反復原爲雲間鴻翔
集中所欲

賦得不作帷中音

低帷似無力支枕故爲妍幽期潛託夢密意寄
抽絃圖像羞並工鏡影愁雙縣嬌怯默有態娛
悅心自憐嫠弱頻轉側目送空流連

喜逢汪子山

夷道難相逢世路有狹邪當驩不爲讌別後焉
用嗟別後歲月移傷心時事乖昔年歌吹地化
爲草與萊悲風嘯白楊朝日生塵埃稚齒無少
容華燈變初暉今日愁莫愁與君上高樓樓上
何所有有女嬌且柔烹魚沽美酒鼓瑟彈箜篌
梧行忘已晏宵終猶未休應知娛我心安問千

黃金黃金如泥沙然諾重倡家任俠少年時壯
歲方在茲不悔金已盡但悔年不追前年銀杏
樹扶疎三尺長今年看樹頭卑枝上女牆當日
且復樂去日母相忘

賦得名仕悅傾城

時集回光院觀
伎與諸公分賦

日出密房晏風送秋殿陰日成非獨眷美合有
雙音媚意羞當鏡中愛謝調琴星河夕夕渡巫
雲夜夜深是花俱並蒂無結不同心緣交忘在
昔卽契匪自今素雪搖華燭春松擢莫林微情

感芳杜屬戀寄連鍼投好疑懷璧要言誓斷金
款誠寧飾貌締構豈宣淫高丘詞始達潛波夢
不沉鴆媒焉用託魚尾永無吟龍光虛再煥兔
魄妒重臨犢鼻榮裾繡牛衣尚錦衾亦堪同負
戴何待挂纓簪樂莫相知樂雖故猶所欽

又代賦一首

陽燧不迎炤炎光適與期蕙蘭猶異畹芳心自
一時夫君清美意賤妾鄙薄姿中質幸有託合
歡良在茲銀燈吐雙焰繡幕不孤垂翡翠縣疎

幔鴛鴦上結縵深情難入鏡色喜僅占眉娛處
翻疑夢迷時亦似知對面如借魄少別成相思

絕詩

喬木抱蠹蟲百尺頽其標故舊懷戚施無爲貴
久要辱金不合冶弃脂難復調孤音謝雙曲密
意暫心招

詠馬

天馬萬里足險路常不辭如何康莊道屈折不
得施櫪阜未易安龍友焉可羈鳴聲亦已達立
市難相希負塗悲外坂失驟望鹽池幸同華山
放無寧羨繫維

寄答

大道苦不夷疲足誰見驅尚賢無夙命忽忽就
牽車念當紛務迫相去遂已殊別緒難重陳中
心懷宴居聞問託夢寐安否省來書久客知夜
長眠食焉能須偃仰猶宿昔寃抑久不舒晉摧
旣云厲遜尾復何如願從梁伯鸞五噫發帝都
遐征而遙集胡爲此煩紆

送錫余

江風蕩枯楊沈陰結爲霰似此顛顛色原隰倏
已變游子欲何之言歸舊鄉縣乘時寡勝策滯
留非本願樂土旋我郊帝京無適戀長屐驅短
足要路懸津岸紛彼都人士華腴不可羨我歌
式微篇臨風涕承面

其二

東隣有美酒南陌有餘糧吾土信言樂胡爲乎
異鄉悲風吹路塵客子晨履霜素衣不改袂獨

宿夜苦長我無盈觴酒愁思焉可忘因風聊寄
訊書罷情未央

爲周元孚駕部挽董夫人詩

悲風起江介草木時變衰昔者蕙與蘭今見蒿
與萊沈陰翳白日泉路無晨暉山雲自莫朝帷
幙焉是非靈心亮未化遺跡猶在茲音儀豈遽
潛髣髴故難知安得懷夢草慰子長渴饑

其二

末路嘗所歷歌怨屬靈修相適在嶮艱豈直同

衾裯高言本希和令德率已酬當厄易爲戀寄
心豈不聊歲月奔走間如何陵與丘靈氣似超
遙朝從神女遊遺思殊荒忽日莫增離憂

其三

淑女自有性蠶領故不疑烈士自有心牛衣寧
悔追申意屬玄初習禮兼明詩二美亮已合棲
託永爲妃容好當盛年比翼中見乖華落不待
秋天要無緩期浩蕩江水外魂氣亡不之

別南中諸友

冬日苦寒北風慘悲晨霜宵露要與我期今日
此別去日難知念歸已甚旅處亦懷浮藻依澤
遊禽戀枝人生偶爾豫之爲蚩坐無美酒以償
所思獨征不燕中心舛乖匪謂久離支夢生疑
匪怨樂遲樂來逢衰弛情卜祝神卽爾謀智士
達命無不宜之

戲作

上有桂樹叢下有瓊枝草少年得夫壻芳澤各
言好好亦焉可爲芳樹多枯枝自君有他意對

面不相知相知憶相見歸鴻接去燕中路起差
池臨風毛羽變書來似未真夢中如有情佳期
夕夕望離颺夜夜生愁絕但如此何用報君子
野火燒草根草然根不死遠望湖陰山前臨大
江流信誓若旦旦水去山常留

送郭次父先生

逸禽無近翮天地爲之羅超風邁雲標接息江
海波毛羽本殊越至性厭煩苛冷音搖紫氛鳴
鳳聲相和愧無矯矯翼橫絕將如何

其二

曲士嬰紛務高士幽且玄託跡在人群脩然太
古前契心自寥曠末俗安足捐顧瞻京國中何
所無豪賢蓬累亦茲駕適意復何言

其三

問君所棲息門當萬里流後有嘉樹林前有芳
草洲龍從互迴壑山中望來游清川接緒風欲
濟非無舟達鴻拾遺羽會心此夷猶

秋思

憂愁爲誰極陰氣相結連一別成遠道三舍阻
重關良晤何可期中意悲且憐不寐夕魂索嘉
夢常獨占寄情北來鴈羽翮似來旋

其二

水流一何勁西上有歸魚形容乖宿昔安否信
來書久客苦不泰愁病相煩紆常恐秋節後慊
慊自患虞寄命藥食間聊以終賤軀

其三

北風何蕭蕭素葉來與期本根一以失飄宕隨
所之刺促岐路間歸願胡其違顏顏理塵鏡神
怯形亦疑憑軒望逝川思情無已時

其四

冉冉歲云莫草枯樹亦零相對無舊物誰當慰
我情白日旣已下素月又以生輕舟自東來問
訊故所親目極心不屬中念常獨縈

其五

靜思見書札益我心未央寄情于琴歌繁音促
以傷對酒似宿醒頽念聊就牀夢短不奈夜恍

居言二集
言
惚闇容光中心自牢栗感歎何時忘

雜詩

出門當作客路計日有程程路難豫占期信常
屢更既遷猶假館當涉仍問津宿糧逆旅間廓
落違其情家居無適樂客子多苦辛

其二

憂亦不終夜樂亦不終晨日月代爲令生年如
久賓辰極自不移當晝誰見明耿耿一世間思
慮常不寧意志殊遠遙馳足于青雲登高起長

望天風難可乘飛舉尋尺內歲莫以屏營

徐翁仍雪洞

崇臺俯危郭幽岫半喬林密構互回谿四壁森
重陰曠基堪蕩志與室可息心素風來與期空
谷自成音白生繇在虛玄守中獨深

其二

西蜀有名山東齊以作宮結宇歛顥氣盛夏亦
玄冬時時集維霰旦旦暝燭龍知白乃爲谷積
素良在躬賦成陳王後卧與袁安同

與君爲別時江水何湯湯君復滯糾纏余情信
未央離緒有永日道路阻且長懷念在三秋遠
適苦寒鄉我聞京國間鴟義時用張鬱鬱碣石
宮何所皆賢良雲上無固棲胡爲久翱翔

其二

去去幾何時結念日已深何以將我念書札來
自今臨流望收潦雙魚亮不沉寒風肅庭際枯
樹自成陰落葉憐去枝征鳥惜異林佇立起長
望何當來嗣音

行路

行路匪難卒逢歲寒淫雨蔽塗陰晦相淹滯留
旬月中期已愆雖有美酒不如所憐離思旦旦
愁緒自牽亦畜之朏亦樹之護心之憂矣終莫
可護

賦得秀色若可餐

消渴金莖露懷人瓊樹枝思情如有託色味本
相期縣眉驚逸態流目羨餘姿驩來憐未足嬌

處意難持阿谷承漿日緇衣授粲時自令勤射
雉非獨念烹雌芍藥投伊謔彫胡爲客炊孤芳
同菊蓋五色借神芝屑玉寧堪比河魴信在茲
共棲心卽饜不見怒如饑

雜詠

厲階日御思緣聞聲晨雞五德不免其身黃鵠
一舉分粒下民老驥困芻曳輪于征雀寔有祿
布翼長鳴松柏本直斧而爲薪弱荷疎蕙延賞
于庭在質寔而莫抗其名在圖好而莫貴其貞
夢珠曜房在握匪珍潛詭是閱當晝失因巫陽
之遇如日初升鉤陳之豔姿薄見賓長門閨寂
憂患來臻帷幄是非立致而神書傳說難恨不
同生當事而前厥施乃刑賦陳子虛安得斯人
待詔門下優俳作倫習聞廉李拊髀歎稱猿臂
一夫羨侯弗辰鳩夷旣逝鑄金以形種也無臯
鳥盡待烹凡今之人遐邁斯親遯胡可尾狎胡
可馴昔東家丘鄉譽無旌視此愿人爲德有鄰
心之疚矣以天爲正

吁嗟

吁嗟谷中泉于處何難期源居一以逝汎漫無
已時經隴或度澗盈涸不自知清合從作涇濁
會安其淄滯淫塞隘間廻湍隨轉移雲氣相引
接江海信所之歸墟既東注弱水亦西馳四海
無津涯宕宕將焉歸濡沫魚腹中爲澤亦不滋
本性愛下流長與根土辭不如處潢潦尋尺寄
污泥枯槁豈不惜庶無傷永離

得寄衣

十月苦寒浸雁后一書臨一縑一似錦一字一
如金客舍朝朝望空閨夜夜心線縫裁處結砧
杵夢中音

青鳥巖詩爲唐武美作

回鴈論險峭華山紀削成茲觀青鳥圖壁立猶
崢嶸大小各有極欽寄寔所經縣石從浮碧陰
洞幻幽清曲雲互葯房騰峯亢竒英絕壁微有
蹊斷壑時復平瀑流空際落靈籟從中生斯豈
人力造信乃神工營主人文且賢結構軒與亭

闕荒乃作徑鑿頑時得貞但與相點綴不復違
真情間或遭毀折蠱義占後庚

丁亥間謠

穀促穀促寄糧膚木荒飽專祿下民鍾腹饑魄
無力強鬼求索積羸作慝莫知所獲

採芳洲爲何仁仲作

緣陂何森鬱衆芳日以滋九畹種蕙蘭百晦植
留萸倚臯多秀色垂瀾法清漪積徑苔藻集長
川美莖披標霞澹的鑠臨風搖參差綴石縈翠

髮緬山妝黛姿迷鱗妖繁波慧鳥鳴連枝陽渚
緒承炤陰洞氣回颺桂檝時宕漾芝輪紛陸離
中有賢主人賓從相追隨芳香喻君子信乃騷
人辭採之欲遺誰但感別經時

離思

離弦矢亦鳴戀別心自驚驚心猶動魄生死難
爲情少去卽經歲期晤寧再更江流無斷絕風
急水聲咽聲咽時復平中意自紆結輕丹度落
日淹留但今夕今夕是今年陰翳各相惜當寢

亦不寐魂寐形卽離孤燈對雙景一一是離思
衣裘常忘葛食苦不記甘焉知別後苦不及別
時驩何以將自憫遠道寄加餐

秋思

秋思時時切秋風旦旦新可憐今夜月獨炤可
憐人故醉約愁緩假寐作情親對面猶恍惚神
識詎相因願隨一葉度稍記到前津

挽明時姪詩

有序

吾從姪曆祚明時少而穎異玄默性成與物
無迂志多絕俗期于大道吾見其進未見其
止二十有六不幸夭沒秀而未實傷哉命也
臨革之際自爲之狀昔仲尼慟恨于顏淵伯
牙絕響于鍾期余悲夫是人歿無復有似之
者爲詩哀之

仲尼悲顏淵麟兮亦用傷大道久淪喪美好尋
不祥賢厄在嘉時天意胡可量殞宮寂且玄雲
松互微芒神氣亮未化形質已銷亡懷清而遊
濁弃捐誠所當但茲親暱交離思結中腸惟有

蘭與玉可以喻容光魂散知難從愁苦告巫陽
其二
我聞鳳皇德所貴來見希黃虞世寥遠胡爲亦
下之託跡衆鳥間中心懷德輝際運忽爾至乘
化倏已辭獨有毛羽光恍惚在雲達文采耿列
星煜煜中天垂顧盼阿閣中咫尺有嫌疑

送黃白仲還會稽

步登敬亭山遙望千里衢衢路何蕭條禾黍盡
焦枯川澗不運杯澤渚時驅車荼蓼代嘉穀臨
淵無鯨魚旱雲率已厲女魃誰見祛久客在他
鄉樂土望來蘇斗水謝監河東海近爾廬念茲
郭落意愁極將何如

其二

失意匪獨人得朋應有時中心苟自寧焉往不
可之我友逝言邁在樂亦不滋輕舟相蕩發夕
宿忘朝饑獨此平生交當厄易爲悲情至氣苦
短何繇明我期道路阻且迂離合良在茲願爲
車下塵從君以驅馳

古詩寄答丘謙之

丘謙之太守曾致一書未及答而太守卒
世再踰年歲家姪泰符往弔之余答以詩
泰符可焚其藁墓上
楚德當昔競君獨歛其端興寄良已深微罪將
自捐維南有樛木近江多芳蘭中情聊所託修
詞峻且玄舉世無固交妖蠱出豪賢高誼寔用
篤豈直容好問以爾梧酒歡正我平生言郢中
聞和曲千載猶相憐

其二

君昔東遊日尺書相問遺裏言良匪它卒歲以
爲期久要自茲篤樂莫新相知盛年不須臾忽
忽與世辭冥陰蔽白日江風常苦悲營魄豈逐
化玄夜猶獨歸我心信不遐微念應見知一爲
楚些哀涕下常交頤

送泰符之楚弔丘謙之太守

暑月晨命駕振轡東南鄉豈不憂道遠我友嗟
云亡昔別在路岐離思感中腸何以當此別悲

風愁白揚舊要如旦莫宿草已再霜生諾未足
期心許信難忘夏雲變江氣鳴鳩辭衆芳撫景
非始念卽事但心傷魂魄知不收黯然對巫陽
其二

使君篤高誼與子誠相知中意亮匪簿素車來
何遲南望江路永排側無已時年歲苦不燕道
路阻且疑親故久凋喪旦旦有睽離哀積易以
化甘荼信如飴望廬懷其人故物猶在茲桂酒
展蘭藉悵悵靈之來長飲竟日夜魂氣庶與期

傷王仲房

有序

傷哉仲房已矣生年八十有三亦古今文人
希有也而余所以咨嗟歎息于仲房者謂仲
房死天下無復有仲房輩者也世代遷謝古
意凋喪而有仲房若所謂歸然獨存者乎而
仲房死是先進風流隨仲房俱逝可不悲與
初余識仲房在弱冠時一見而驩若平生恨
相得之晚余亦喜與仲房譚以日夜不厭蓋
仲房生在正德初紀爾時名士大夫以十數

輩皆好仲房與之友而仲房有四方之志其
氣豪邁凌一世人一世人皆驚異而敬畏之
至嘉隆間諸文章家皆以長長仲房而與之
議論不啻不廷廷也古仲房于時漸不習而
時愈趨仲房房愈益厭人人愈益怪仲房仲房言
事激烈善用謔刺風人中多寓言然深厚有
至意焉大都傷世之不公而已余嘗謂聞他
人諛人乃可怒聞仲房詈罵人乃可喜也仲
房詩格老而不衰而薄劣少年務勦說名家
調自矜已窵貨嘗指摘其累句以病仲房仲
房不屑也雖片言率語皆有真意寧質毋窵
今仲房死更有作是語者乎抑有稱弘正間
名家一一悉其狀者耶亦孰爲古衣冠步都
市間令人望而知爲耆舊以振其靡曼者也
傷哉仲房已矣雖然令仲房耆而卒余幾不
得見仲房余之及見仲房猶以爲幸耳

喬木胡瘁傷老成胡云亡周鼎旣已涸神姦憂
跳梁道路浸以薄士節失其常新詞象窵言靡

曼不復揚遺音誰克嗣邈矣王仲房生長明盛
時閱世寔已長髮短心不違日晏思再明白首
在岐路中意仍慨慷清食而濁游信非情所當
大耋寧用嗟引領獨難忘

其二

嶮路知逸足濁流知勁鱗草木有榮悴松栢得
其貞故物不可卽閱世日已新言念一如昨感
序懷先民歲月與逝遷餘風來襲人典刑旣云
邁傷哉老成人

贈丁南羽

離緒緬以邈歲曆忽九新循聲岐路間眷眷我
懷人別久易爲戀相見情彌親悲喜各云集譚
讌遺昏晨摘葵理芳饌取酒濯塗塵積素諒已
通締結非等倫征車邁難留颺霰謝陽春朝發
海陽邑夕宿漳水津臨流歎逝川寸晷當自珍

其二

耕種文史園酣宴翰墨林茲計寧所安達士多
遠心遠心將何如翹跡超古今正靈誠有宅玄

覽中獨深棲神紫天外寄思白雲岑濁游亦不
溜響寂聞妙音風期本宿昔高誼良所欽役役
終歲年無因滌我襟

贈孫子真詩

處世心不怡悠然懷隱淪隱淪何必遐卽已在
人群人群信自超志意象其真清游當濁路終
不染垢氛正靈亮有舍末誼焉用殉荒沉謝驩
伯識密洞微塵遺思翰墨間形忘神益親自無
丘壑分負愧將何云

其二

昔年滯舊京餞別孫楚樓湖光相蕩漾蘋藻參
差流懷材思子荆弔古歌莫愁市喧緣境寂櫂
影溯烟浮明尊數已更征車爲之留去日本易
長一別三四周因君生感憤忽忽追昔游荒址
若爲葺勝蹟聊百酬適意水木間長笑俱悠悠

其三

適余命不達生計委荒榛逢世旣寡術避世猶
未能遊道膠以固盡室寄饑貧託心沉酒間庶

以全吾神我友自南來相慰誼何敦繇知此爲
別岐路迂且分懸旌摧目亂秋氣感心魂藉言
致朋舊無忘平生親

采貞詩贈胡仲魚

居世豈不樂世樂復何如樂在旦夕間耳目爲
燕娛縕火卧積薪枕毒甘其荼貞松歷寒秀靡
草當夏枯感物中獨懷託志爲遠圖遠圖欲焉
之八極故有初有初乃無始衆妙立常無寄跡
在塵域神邁形與俱練心大清內至樂云何須

其二

靈棲信有宅不必在蓬瀛卽心已遙邁誰謂非
神垞霽囂以爲寂緣濁亦作清專氣柔自裏踵
息馴其經攝躬紫氛間頽颺翼我門八風相盪
摧中情無惕驚天柱有時絕至性常不傾世思
徒冉冉雖貴何足榮

其三

黃山帝夕室神鼎勢鬱竒上有丹砂峯下有五
色芝龍物沼清晝玄雲簇異姿似茲峻峭觀靈

恠誠有之胡君意何迅幽討中不迷塵垢謝世
人貞士相與期安用綺編裝招搖承履綦寧事
車蓋遊條間良可騎翹首天都上難可與等夷
其四
閱世代以故閱人代以新感念新故間誰復得
其真靈根無久芟零落同埃塵何如遺世修世
外求竒齡岱宗汰初籍闔闔聊我身抗跡人寰
內長與天地賓

送何長卿詩

國朝製作如詩文書畫以至于瓷玉絲刻漆
雕陶冶諸事俱不逮昔人以其逐逐規模不
能自出一機軸耳獨何長卿圖章真可凌唐
宋元而上之何以故其法與韻俱勝也今長
卿且老竟無有從授之者信乎一代絕技難
于其繼哉長卿東行余請得一方藏之如寶
商彝周鼎矣詩以答之

神解故遺轍技單乃入微斯邕與鍾王種種亦
相師相師由自心創述各有宜何如近代人肖

似愈失之匠古古在我何君誠獨竒岐陽衍周
金鄒嶧按秦碑盤礴信真史蓋旋知王倕冥心
寄象外妙意窺天倪秘術胡不傳輪扁亦云茲
笥中得一章珍之如鼎彝

贈齊雲山磨崖德政碑詩

齊雲山崔嵬石勢飛參差懸壑有千仞轉遙多
逶迤天構成巧鑿地脉互幽姿如何深谷中而
少塵外思何以羽士林而與市道期滿壁俱穢
跡摩崖綴諛詞但知媚當世不惜真意離豈歎
山靈怒仍爲文鬼嗤我從猿鶴間效作北山移
慎哉立言人毋以殉其貲

贈程君衡大學

遨遊在京國爰憇淮水湄淮水清淺流第宅羅
參差中有嘉士居塵市猶欵寄蘭桂森庭砌圖
書陳四垂棊尊與客談文澤紛相馳愛客出本
性寧直名譽資舉世素交盡此誼良歎希

其二

念子多永言貽穀名其堂寤寐雲玄際徘徊俎

豆旁思每同季路文乃藉中郎立身期始終負
荷茲所當時覽白華詩長歌聲自揚至心懷明
發篇翰期可常婁東一片石耿耿生夜光

其三

涼風高且冽秋氣感人心客路少故交邁跡蕭
以森所賴賢達者取酒相酌斟肴烝不及施楛
觶就沉淫語笑出形外結志幽且深鳴雀亦在
陰九臯有和音

其四

與子誠相知同歲適同遊相知豈一朝宿昔爲
綢繆壯年無何時倏已四十秋齒髮若似昔志
意余不謀但有盈尊酒可作汗漫游道路有雲
泥踪跡亦沉浮願君存古誼皓首以優優

端午

出門在何時三月日初長遷延途路間今日是
端陽惟底路傍兒面面皆調黃遊子感節序中
心懷故鄉故鄉何所懷有母在高堂兄弟時滿

坐見女紛成行三三與五五取次飛行觴調笑
或一室妙音中自揚惟有友朋樂遊處足相當
立馬喚友人沽酒與客嘗我思殊勿勿庶幾得
所將

甘露園

接目遂成境覽圖信竒觀楚水波沈瀾荆山氣
鬱蟠名園依勝地佳事遂此攢膏露况已集寧
獨誇幽蘭蘭芳及秋艷露泫當夜溥甘芳在一
時樂饑良可食景風時與翼慶雲將作冠醞枝
規土因爲池壘石亦似巒豈藉三危紫何必仙
人盤尚矣碩人詩在阿歌考槃

且適齊爲金翔龍賦

穆穆鍾阜日蕭蕭淮浦風結廬在其間清曠得
所從何以京華客而與丘壑同近江猶作帶遠
山當列壙紛艷不入目囂聲不蔽聰適意在塵
外祛練良自中豈必人境絕而爲高蹈踪地與
闌闌接心與羲皇通

寄閒軒

坐兒女紛成行三三與五五取次飛行觴調笑
或一室妙音中自揚惟有友朋樂遊處足相當
立馬喚友人沽酒與客嘗我思殊勿勿庶幾得
所將

甘露園

接目遂成境覽圖信竒觀楚水波汎瀾荆山氣
鬱蟠名園依勝地佳事遂此攢膏露况已集寧
獨誇幽蘭蘭芳及秋艷露泫當夜溥甘芳在一
時樂饑良可飡景風時與翼慶雲將作冠醞枝
斯瀼瀼汪葉自漫漫眷茲園居樂選勝誠足安
規土因爲池壘石亦似巒豈藉三危紫何必仙
人盤尚矣碩人詩在阿歌考槃

且適齊爲金翔龍賦

穆穆鍾阜日蕭蕭淮浦風結廬在其間清曠得
所從何以京華客而與丘壑同近江猶作帶遠
山當列壙紛艷不入目囂聲不蔽聰適意在塵
外祛練良自中豈必人境絕而爲高蹈踪地與
闌闌接心與羲皇通

寄閒軒

碌碌人間世攘攘亦熙熙積勞乃成劫閑者當
何誰逐日計短長夸父猶爲疲胡君有高意獨
與玄曠期結交惟綺角言採南山芝江光近浮
滕山翠遠當眉暇豫寔所豐琴書或自私達生
聊足託萬事隨所之

中秋日吳江卽事

不期我亦至不期爾亦留契晤豈神構夢寐來
相求始見故惶惑中意自綢繆雙喜復雙悲各
言心所憂所憂離會間一別成素秋

其二

秋風澹微波噫氣相與還微雲綴清月明暗兩
不關沉歡且無寐短景忽忽間孤燈寄微戀此
夜寧足淹開明已東生別緒仍相牽

送吳用修

人言新知樂新知多煩憂鳩鵲已得羣鳴噪常
不休睽索難獨居暱好難自謀當晤預爲別寧
知非有求展轉至日莫託念以輕舟

其二

相去不必遠對面有河梁望望一水間欲濟非
無杭伊我斯懷人愁鬱寧所當歡端尋怨緒倚
伏安知常歲月逝不留夜露爲朝霜寄戀殊恍
惚慊慊心未央

其三

相識非有素一見遂平生四坐寂無言幽意誰
能明各各來心寤時時與日成清桂得幽蘭何
患不合并合并如可常化枯猶作螢榮凋難自
持歲莫此屏營

其四

秋氣何方來蕭然楓樹林楓林豈獨寒遊子多
苦心苦心爲誰極遺念枕與衾衾枕良亦懷况
乃中所欽晨雞促征棹宵鴈振離音素風厲復
悲歸流浩且深何以寬我念朝日藉餘陰遠望
蒼雲間目斷情難禁

其五

蟋蟀化鳴蟬鼓翼高樹枝吸風飲墜露穢濁乃
不緇至性愛孤潔誰慮泥伏時爲茲沉心曲願

託深林棲委蛻猶匪難亮君誠察知

三豔詩爲吳翁晉作

麗波揚令節芳風盪沉陰蘭臯醞夕氣鶯樹流
朝音弱荷旋落浦翠翹挂幽岑桂楫時遠逸積
綺聯珠林山媚遙似碧澤艷絢若金嫋容誰見
屬騰目一相臨衷授非以色密眄良自心殊衆
豈惟貌遺世寧獨今約念不可翦縈戀何其深
序思夢寐中驩極悲難任

其二

吳美若無態越豔難爲觀平岫有奧區素波靡
沸湍膩理廢脂澤馴質謝綺紈乍至疑含怨少
進似着驩驩怨兩不涉誰能窺其端曾波忽轉
睽曲雲眉半攢笑歌倚修夜醉客澄清瀾揚詭
掩黃竹授思本幽蘭迷情眩寤語酣愛攝輕寒
喜深心故怯食苦猶用甘

其三

莫莫白門路楊柳鬱參差和風乍披拂偏反難
自持東光藉佳蔭西景翫餘姿迴颺時破睇留

霧數顰眉搖悅端可羨採折當及茲綠浮波盪
漾青暗兩眸離密心同結葉紫緒似連絲秀幄
正堪適芳練本相期春隄無久曙忽忽歲月遲
已失遷鶯處徒有啼鳥枝

寄曹以新

踟躕復踟躕別君吳會間吳會信非遠一去三
四年窮與老相值榮與盛相捐居處廢初心遊
行常苦煩形影自覺異然諾詎能全褰裳畏濡
足心往氣不完所與慰睽違時時聞寒暄對面

猶未悉寧足寄人言目送東南流何時見容顏

其二

世道尚冕浴我與君知之李郭附新門金張借
譚貨安知楊子雲玄化仍相嗤際升不憚高當
處不厭卑卑高自有分吾汝焉用爲仰顧崦嵫
雲俯拾扶桑枝

其三

自與君相別貧辱來侵人市酒常不醉金甌生
積塵親交顧眄盡乞憐慙已頻一室有阮塗平

居如在陳誰所與告語旦旦祈鬼神無望豈爲
福倚伏誰見真展卷寡意緒起步西至辰愠餘
時作歡長歌當看尊近况但如此我友寧欲聞
思念千里外爲德自有隣書來多感慨使我心
憂慙

懷景升

一室苦不泰塵務糾紛之醉寤亦無間交論廢
禪竒性靈應未化清夢來相期夢中復何如獲
我故所思空谷聞足音喜悅當不貲碧月皦霜

練青松標雲姿譚鋒勁以勵辯囿紛哉離忽忽
衾枕間展側失故蹊肅肅雙鴻鵠日送神亦馳

其二

南國昔與約臨發車屢旋今年欲東首冰雪阻
窮年故交音問濶積思故成憐夢見在樓居敘
論高且玄飲酌未及終神舍忽已遷異地懷同
否遙望心流連

父柏臺詩爲李本寧太史作

臺柏何森森望楚懷先賢嘉蔭此封殖豈獨甘

棠傳遺策五柳詠招隱叢桂篇時畧方茲構將
父已歸旋胡不念薪櫛至性本貞堅高標蕩煩
濁芳緒拂雲玄嗣美擅郗林玉樹羅庭前世臣
應喬木風尚夙已懸俯梓寧用規陟岵時相瞻
榮名匪徒貌冥靈空歲年

催妝詩爲

程康伯作

東光戒朝馭環月將夕臨佳辰萃華務芳緒森
繁陰流影接宵練風翼通雙心兩美信茲合結
意幽且沉鹿車旣在戶鵲巢會當吟豔曼匪纖
麗堅好要蘭金騰日引曾波修眉眷遙岑衣此
纏綿錦相締瑤華簪

其二

樂矣新相知黃昏指爲期爲期旣有日修容當
何時便娟厭疊服秀雅結華綦小星要撰步清
月待凝姿越鬢耀珠澤吳髮綴雲枝芳脂相編
具溫玉副柔荑龍光自茲煥魚尾永無離眷此
六珈色一心不相疑

其三

輕風扇廣陌女子今有行雅容與秀靨是郎眼
所經素霜揚皓齒歸流漱微聲巫雨有餘潤洛
波分遺清當軒理華髮眇眇芳霧生一顧心若
亂十步光初盈珠幃趣當御璧燭炤粧成入鏡
猶自如媢然獨含情

其四

郎家誠易知砥室翠翹連朱塵緣曲戶畫棟羅
宵烟蘭風汎修爵方綴挂珍筵琦璜猶足玩綺

組何其駢結用合驩被裏以同心綿昔歡正未
闕今情尤相牽得巢同鷺翠已妒如鸕鷀且莫
論純素新故俱所憐

與王百谷

昔者延陵子聞樂識其微至音莽寥廓千載誰
相希我懷在東路風尚夙所期雅聲振玄秀柔
調映芳滋卉木亦借色山澤無餘暉秋實亮已
敦朝華非徒披願言相盼眇無以鄙賤姿

其二

新居枕塵市而有林泉觀方沼懸碧陰復徑流
潺湲隣樹藉幽姿叢鬱峻其藩玄雲緣構曲翠
翹當綴連光風轉修竹夏室猶亦寒信哉高士
廬不問寂與喧

別吳孝父

靡靡歲將夕岐路風始寒黃菊既辭榮江樹俱
已殘遊子懷歸心輕舟將南還故人憐我意取
酒聊相寬與子自同裳豈曰衣服單人生會有
寤愁鬱徒自煩且復坐笑語庶以娛容顏去去
卽長道夢寐時流連

荅徐茂吳

慶雲不可俟黃菌難相因管道各有屬進退聊
我身歛德在明時誰能識其情世塗未足夷大
業良所經結志蒿萊間往往有遺聲日月御中
天何虧不爲盈中心自念惜千秋常獨伸

其二

聞聲自宿昔積戀愈歲年尺書非素心千里愧
比肩幸適茲良晤顧盼中所憐蘭皋有餘芳用

結平生言弱條蔭修幹白石厠瓊璫哲符固匪
因中曲良已宣所貴親交誼在遠終不讓投翰
敦我懷令德共勉旃

江行

平生苦行役風遘常失期百里姑孰道三宿猶
在茲岸帆亢怒濤水力相競持寄魄波浪間中
意怯且疑江豚時起伏颺信不可知神變目俱
睨近洲當復遲久旅魂夢單夜念焚若絲寒鴈
過我側鳴聲亦何悲安得借羽翼雲際俱奮飛

懷潘景升

景升辭家客游旣不得意乃淹久無歸計聞
其在楚落落殆甚借交冠紳託息狹邪非其
心也以嶽竒濶達之材而示跡燕暱當清晏
休嘉之世而常罹沛顛都人士務殖重貲乖
其曹好唾罵姍笑不間于父母昆弟之言遂
乃有傳其旅死者徒快俗士之譚而深動勝
流之憤余固知其誣也屢夢見之作詩紀之
滯留在何所方城漢水間久客交誼薄平路百

折艱遊道旣無當家計良獨難相去不十舍何
異隔九關行吟日復多哀怨亦不閒于今豈濁
世胡爲憔悴顏夢來非死約目極望生還

七夕

涼風戒秋序佳期懷夕張此離有雙念反側愁
異鄉獨絲難屬縷單鵲不成梁寒燈戀初暉斜
月淹末光服廂憐返轍涉津憚寒裳顧盼營室
中轉轉心內傷

葉循父招集雨花臺得文字

南郭秋覽勝招集首自君丘阜非險絕曠望極
繽紛繇得地形壯坐令遠近分城襟點翠靄山
腰拖素雲屏上絡蒼碧鏡中流氤氳江光澄密
練林影綴細紋界圖抹淺黛冶金躍餘曛東甸
引微霽西颺揭淡氛淑景聊已接佳酒半疑醺
逸情便在野良韻聽然聞游思挹花雨結好紉
蘭薰莫待衆芳歇經歲感離群

送魏辟疆還豫章

秋氣正蕭瑟旅處心不怡愁極癡登臨何以送

居言二集
將歸寒月拂征旆天風汰宵衣窘路尚睽索燕
笑曾何期立譚無與偕誰爲聊且饑落落白門
道寧復可棲遲靡遇不得窮對歡俱作悽謁景
感情緒執手有遐思君當自茲發余亦行將違
其二
相見不必數締結日以深同聲相問訊惠我淫
華音世態薄素修俗務紛且淫風志阻近謀賢
達無遠心莫莫都市中誰爲存所欽因君生感
慨庶以及來今

招隱曲寄吳允兆

勝遊不擇塗山棲不避幽魚鳥有本性何以異
沉浮昔者東方生金門可優游亦有嚴君平足
跡謝帝州真情愛松桂同器忌薰蕕輪轂淹泥
淖尊俎潛戈矛流塵眩日光魑魅走道周舍旃
盍言旋春草盈芳洲

其二

故鄉信云樂爲樂復何如水藻緣砌生山翠絡
坐隅白石卷清泉華雲襲輕裾迴谷可爲藩修

竹可作廬客至聊命酌藜藿味有餘競心惟奕
事意適還自娛契晤集友朋畢志在琴書登高
睠逸禽臨淵觀游魚素風披炎塵芳氣聯幽居
冉冉歲月間胡爲久馳驅

柴莊

息鞅謝塵務結廬在中田荒塗少人跡惟見陌
與阡佳樹垂隱蔭澗水流漸漸陰鳥或自呼階
草時絲芊衆芳發春日繁音颺風泉晨起理書
策夜坐亦成篇同人獲于郊可以竟歲年

別李季宣

一別幾歲年論心各紆軫北轅君暫息南路余
尤窘壯心辭百折衰緒起中隱素顏收餘潤宿
念俱已寢悲哉客遊子失職懷坎廩相對平生
歡意在言不盡江流日已深天氣日以凜曲讌
梧未終風高曙光暝斜月縈漏光幽暉襲人冷
君其自愛憐歸棹余當整結戀如繭絲寤寐時
引領

程康伯家看菊花

高館臨修夜良朋集綺讌寶月下簾櫳明燈逝
相眩微風蕩薄雲碧天搖淨練不信是秋日名
花簇清艷曙壁歛繁星華幌綴驚電修爵旣無
筭度曲亦屢變宵終未改席芳心難屬饜

其二

昔者陶彭澤所愛黃花幽積素乃成絢婉變生
綢繆雜沓分異態上下枝相樛清華湛高燭涼
韻肅嚴秋夜光疑失魄瑩暉密與浮美人如滿
堂目眷非阻修凝姿似回睇芳緒期未適何必
護樹背卽此忘沉憂

雜言

烏啼有惡聲人不探其巢鸚鵡多慧性樊籠仍
復招鸚鵡固能言其舌亦見彫鶴鳴高且清六
翮不得遙珍好受禍虞厭惡全以驕材與不材
間擇處難自聊

感懷

少小賤殖貨壯歲果屯遘何物預我事憔悴生
盛年本無取戾資平世逢沛顛檢橐罄餘粒突

竈斷人煙冬衣已辭笥夏衣未能還兒稚顧我
泣日中無粥饘妻孥對我歎三旬無囊錢禾興
既油油麥秀亦漸漸際豐乃恤饑寄息陌與阡
懷古慟此衷因窮思顏原其意或有託遭遇恐
未然誰寬目前苦徒冀異時憐

其二

世短憂苦長達士之所悲憂短恐世長俗人以
自規如彼營營者慮年不待貲秋成防旱歲老
至愁期願寧使厭饒溢安復辭勞疲余悟至人
言得失無定期窮至難自淹道古佐窮資窮去
不自振盛氣招窮來既與窮相習更與窮相支
因知五經笥無非窮所依死而含珠者猶賢生
布施

讀易山房詩

通籍宰巖邑名達已投簪豈無善世符撰志在
中林觀象六虛間易道幾且深倚伏亮不常損
益時相尋潛龍無後悔飛鳥有遺音儉德泰交
際誰能獲我心介石與賁丘此義尤所欽

世塗無淹轍浚谷有特棲契心三畫前寤寐見
包犧氛濁夙已蛻至道微且希蘭風引叢薄雲
葉互迴谿潛德不厭深當遯能無肥鶴鳴占子
和好爵猶在茲登高望漢南翹跡難與齊

紀遊

茲遊良適意問一得三長山川與杯酒隨處俱
若忘風度輪陶史譚鋒遜袁郎潘髯詩思美意
氣猶飛楊閒情戒前誓妙色避名倡我自不作

尊庶幾心所降但恨別程促後期懷景光歸去
誰與語相詫向吳孃

石橋崑同陶周望太史袁中郎令君潘景
升作

回谷陟危岫石梁跨峻嶒虛巖茹靈舍怪石吐
陽痕群山咸拱立孤峰正當門陰晶垂雨練牝
壑挾風輪近蒼繡寒壁遠翠搖雲根惜此渾沌
竅多贅題鏤文願得苔蘚迹素質庶與存

飲南華美人館卽席賦贈

玉樹臨春甸素雪搖風枝面疑微傅粉膚如乍
凝脂狎情流韻處朱顏半醉時酒程峻苛罰曲
豔映芳姿華燈洗淨練壁月鑿修儀昌頤兼秀
雅信哉頹人詩光炤十步內目奪神爲遺送客
獨留後相對猶九疑

贈李五

昔者蔡文姬不忍別單于何以蘇屬國兒女弃
之胡我商古今人仲尼情歎殊破涕遂解驂惜
淚如惜珠誰可殉我念身與錢刀俱誰可斷我
思酒與酒家胡誰能解此意一荆一以吳誰能
畢此念醉後天模糊

二水園

人皆集于苑君獨愛谷棲攢峰遠作衛複嶂近
成帷何以元凱儔不忘箕穎期際升無宿念懷
往有餘思尚哉逸士心游濁亦不淄

二水園

萬善莫如水我聞老氏言二水相與環此義玄
又玄合流成曲沼下澤爲通川汪洋天勢接映

帶雲光懸如此園居者翳然濠濮間

陸海

陸亦復有海海亦陸所連不見海中馬而有陸
地船神情惟樂土襟次遠彌天所貯誠不貲水
月觀雲玄滄桑或代更而我神不遷

信宿蓀谷

遲介如上人夜譚

行役復行役塵緣日相逐願息已多時問道至
蓀谷谷口徑縈回夾道皆修竹映日間明暗搖
風常簌簌緣磴望崔嵬紺宮俯朝旭躡雲互檀

烟聽雨省飛瀑泉竇似散珠晶瑩洸凝玉裂崖
疑有痕畧空或藏屋伏虎怪石蹲旋虬知澗複
幽鳥音上下清籟兼斷續初晴林爽然遠山如
新沐契晤良已久客程離見促忽聞卓錫來相
迂在山麓信心匪直今種根良自宿莫逆竟忘
言頂禮辭繞足自分欲障溪無繇謝塵俗中意
苟不迷願言終我勗

兆綸像詩

隱几同南郭趺坐似祇林鹿門栖自足羊裘意

已深曠度何其夷神氣清且森爲龍乃爲光如
玉亦如金夜月時揮塵高山乍鳴琴目送冥鴻
外悠然生遠心

沈君典

君典似淪跡本自青雲姿長歌俠少行起從屠
沽兒鬪雞注金距走馬飾金羈布衣稱豪賢不
得顧中私結納信所愛貲用苦不遺家無擔石
儲十千仍一揮慷慨示情素託喻在聲詩迂俗
任流議各有衷所期彼哉鴉鳩倫焉知鴻鵠爲

十月二日爲余三十生辰友人余宗漢謝
少廉少白劉季然金聲伯徐蜚卿王曼
容置酒樂余以詩報之

役役三十年疲曳中路衢對鏡理容色久已慚
壯夫浮言罔性靈卑跡偃馳驅我友敦我宿置
酒相悅娛膏澤臨曲房嘉旨薦中厨達旦燭屢
更卜夜觴無餘當驩忘在客醉極起自呼酬酢
心所當豈不懷舊壚親交良已泰豈不念倚閭
道里非遠遙託意以懸弧歲晏芳草歇不樂將

何如

其二

主人行獻客客子答主人
道路有永夜此離惟
一身敬謝茲良晤取酒遺我神
我神何可遺思
情常不寧寒霜侵帷幕孤卧望及晨
晨起多紛
務歸計猶再更落落當壯年
屈折難自伸人生
百年內貴在適其真
介介獨何如習與憂患寘
贈呂公詩
楚良在和璧白珩亦異姿
美此未爲寶賢達始

見竒當獻宜亦珍况爾屬明時
積蜚非有漸際
升亦無階雲天何必遐羽儀
信在茲德音出原
谷師曠聞知之但願久要誼
猶用懷我私櫬栝
繩曲材邂逅卽良期

其二

自公多暇日興情翰墨林
堂下無絳政堂上有
鳴琴立化格猛氏爲德寔已深
嘉賓滿坐隅四
國懷好音清論不及私
良約時可尋余亦介紹
末挾策來相臨自顧非匹儔
况復異蜚沈高誼

亦何篤情盼良所欽願因結綢繆毋以有遐心
其三

昔聞二千石不如逢掖尊何異海陽令先候處
士門新知良用樂故交誼方敦于心苟不瑕豈
必同華軒周公下白屋天下稱其仁德謙今始
達盛節日已宣範馬繇簡駿化俗在親賢尚哉
君子道終永不可護

雜感

戊寅冬作

寒色不以冬玄岡生陰森陰森何以言浩然含

悲辛何歲日弗故何世人弗新譬彼薤上露亦
如風中塵塵飛終有歸露晞可再晨人復不復
反營魂無依因螻螳結爲歡魍魅託爲鄰萬事
從始畢欲爲不能明瑕瑜衆人口欲辯誰爲聽
存者但一哭死者日冥冥

不寐

獨夜永不寐晏坐臨堂皇明月落我屋星宿縱
復橫秀木結重陰哀音來何方待旦有遺跋卜
夜留餘觴歡端尋已隱憂緒殊未央徘徊衆感

作盤錯摧肝腸山鬼號中野魍魅遊道傍荒市
亦成虎岐路多亡羊中逵軌欲絕大舟壑焉藏
隨飛天難窮欲濟河無梁淒風扇爲令朱燈戢
其光遊子心不夷日暮常孤翔精爽沈且冥懷
短悲已長寂寂何所迫慷慨奏清商

聞鬼

玄雲翳四野悲風被長巒陰陽爭爲命霜露淒
以寒中夜氣機息衆籟沈其端間者猿啾啾亦
復嘯填填山阿若有人宜笑若有言冥冥表獨

立容容載營魂是耶誰能明非耶誰爲宣倏來
悵忘歸倏去焉可原潛燐不自照遺音知難傳
鷓鴣胡啁晰幽篁徒嬋媛從之眇無際慘愴衷
鮮驩刁刁萬不齊一氣錯其間卽著旣已微窮
隱良復然長寢萬事畢與之相周旋

居諸二集卷三

江東梅守箕季豹父著

五言古

附四言古

秋懷詩

秋氣本搖落清氛時蕩人蟋蟀在中野蜩螿鳴
桑根良人遠行役空室寄孤笑玄校未改色芳
歲忽已更案戶無履跡延砌生浮華虛影黯宵
光中懷常惕驚沈思亂心曲側側何時平

其二

白日易流邁徂暑動及寒陽緒不終歲零露夙
已溥叢林有墜葉收潦無濁湍枯條迎回飈肅
氣相與旋砌蟲知候違哀鳴悽且繁所嗟人生
事鬱鬱傷肺肝逝者如斯夫川上以長歎

其三

玄雲啓將夕素風相與期驟雨自南來溝澮猶
未滋禾黍亢如焚積枯故難治自無素餐願初
意安且饑斗水安足乞餘光寧見遺廓落空谷

中淫溢顏將罷志士達時命身賤理不虧

其四

凜風扇梧楸菸菑獨可悲陰雲翳昭日坎係代
恢台芳藹日無色繁柯何多枝乍零難足觀積
消良已滋時蹇望運更年促憂歲移怛至日
是誰爲發我疑

其五

大瓠固異種五石焉用之何不慮爲樽江湖適
我期亦有百金技泝泝終其貲和璧當在璞燕

其二

白日易流邁徂暑動及寒陽緒不終歲零露夙
已溥叢林有墜葉收潦無濁湍枯條迎回颺肅
氣相與旋砌蟲知候違哀鳴悽且繁所嗟人生
事鬱鬱傷肺肝逝者如斯夫川上以長歎

其三

玄雲啓將夕素風相與期驟雨自南來溝澮猶
未滋禾黍亢如焚積枯故難治自無素餐願初
意安且饑斗水安足乞餘光寧見遺廓落空谷

中淫溢顏將罷志士達時命身賤理不虧

其四

凜風扇梧楸菸菑獨可悲陰雲翳昭日坎係代
恢台芳藹日無色繁柯何多枝乍零難足觀積
消良已滋時蹇望運更年促憂歲移怛至日
是誰爲發我疑

其五

大瓠固異種五石焉用之何不慮爲樽江湖適
我期亦有百金技泝泝終其貲和璧當在璞燕

石仍見蚩竒思鬱不通結軫增睽離時泰幽部
昭道暗日中迷相羊聊卒歲此理亮獨知

其六

廓處心不繹眷言友之期所期在何方山川阻
隔之詩人詠三秋况乃三秋時道當衰薄際聲
跡易以睽車驅自南來中有遠遊人攀車相問
訊云是故所親下車攜手行容貌日以新憤恨
羈旅日艱厄併一身別易會如此序悲復志喜
取酒烹履葵歌聲坐中起人生固有時落落胡
爲爾秋中遣鴻鴈春中鴈北鄉六翮按候風焉
知道里長

其七

此鄉亦吾土此郭亦吾城胡爲如羈旅朝舍莫
卽更履決弗禪踵冠敝不足纓棲息列肆間中
夜寐獨驚絮清受蕪穢非故心所經壹志寄疇
往淹留蹇無成迅翮嬰密樊震盪常不寧容與
竟年歲何以將自營

其八

宿昔負遠遊羈戀鄉國間身不說罔羅足不至
名山託心豈不遐始願胡見愆道在徃攘中締
繯誠難遷高木苦徽纏良馬躡繫牽流波善沒
人悲哉誰能權

其九

少小慕俠烈兼懷勇健資壯年一以迫怯性始
見移室中常畏人出戶因可知數年我學易反
家得明夷家計仍舛乖履安乘其危人生百歲
間驩宴曾何時顛沛在閒適將以問靈箬

東門別和景升作

前日別東門揮手談笑間柔脂力不運飛日顧
不還私眷在形外初意局中關兩悟各無言寄
喻微開頰誰復証此事百劫應未慳

禹岳山人溪上居

禹岳山人一畝宮耳且近市乃坐其中如隔
世上幾萬里余方知芥子內須彌維磨方丈
室置恒沙諸天人不小丈室不大非徒喻
也遂爲詩焉然謝靈運遊山諸篇寫山川形

態大盡識者猶謂其少真意本色也以余之
塵俗而過高士之廬恐有非筆力所能避者

奈何

清情遺俗代近跡有遠踪如何人世間而操世
外風何以祛煩濁川流宕滌中誰爲清作籓有
竹復有松豈必事結構任天易爲工魚鳥能親
人山水與意通攢青俯園樹擢翠森孤桐合流
環爲塘左入右復從葭葦備足玩芹藻猶堪供
深坐不知宴心與懷葛同我自好閒者因君感

素裹

其二

誰言貧士貧貧士富不貲我讀泌水詩洋洋可
樂饑饉亦未必樂庶與囂喧辭松風豈不喧可
以清心脾幽徑豈無事壘土修竹籬卧石規魚
塘鵲巢偃高枝女蘿冒嘉樹新篁誘漣漪終日
營畫間所殖惟在茲足意寧待盈盈詘當何時
但自適其志萬乘安足希

看流觴處

涓涓不竭山下有泉潛流淬石激湍迴連臨深
俯掬滓垢已蠲爰茲清滌以樂歲年

其二

山行不知疲水涉亦成趣石溜漱清川泉根籥
深霧披蓊得舊蹊芟竹閱新路接飲曲澗中幽
襟良與晤

程光祿允吉山居十二詠之十

長春堂

構居山澤間昭日自飄颺垂蔭擢千尋族茂盈

萬象榮色何雜糅鳴條律已暢化幽時作明飛
音節俱亮燭龍常不瞑鶴鷄擾相向

樹蕙館

九畹滋蘭若百晦植流莢芳氣歲不歇臨風紛
陸離綠葉緣紫莖綢結荃獨宜緒香聯丹秀素
豔凌瓊枝朝露時靄靄夕雲常霏霏

摩雲亭

昔者柳子言遊觀有二道曠則凌嵯峩奧則窮
要眇結構在雲端登頓俯蒼嶠超然暢逸情塵

外信高蹈吾亦好奇跡整翮思欲矯

北園

山水有真意園林無俗情蜚流漾曲緒磊石象
崢嶸珍木擢玄灑朱華汎清冷遊儵泳且樂好
鳥棲復鳴坐嘯北園上可以娛吾生

挂笠亭

不結貢公綬已挂疎氏冠何必車與蓋戴笠亦
自安夷猶謝塵鞅耀首非纓鞶寂徑意亦澹高
林秋不寒誰可與茲友籜束及箬簪

芥圃

在昔於陵子灌園辭三公亦有東陵侯種瓜避
秦封今茲學圃者寔有古人風解佩歸舊廬田
畝可從容群蔬芥尤重肉食復何庸

襲芳亭

桂叢掩小山蘭皋遡沅澧我讀離騷篇芳澤喻
君子坐卧此亭下芬敷集衆美浥露時鬱都從
風來猗靡蕩樂娛心意可以和精神理

延秀閣

層軒倚危岫結宇玄且峻光風轉曲戶朱塵羅
牕淨嚴冬有餘溫昭夏佇寒蔭積翠似懸幔雲
綬如當鏡朝華旣已披夕秀亦以振

晞髮池

與汝沐咸池晞髮陽之阿朝陽擢素流輕風拭
微波星鬢宜隱映雲冠鬱巍峩洗耳巢父水濯
纓孺子歌信自同高潔慢世復如何

御風臺

我聞列禦寇御風以爲行至人與天遊練心存
正靈高臺凌紫極衆籟發竒聲雄舉椒桂間翺
翔拂秦清屏氛延沆露白日羽翰生

讀袁中郎詩

君有昆吾刀切玉如切泥遂令江淹筆化爲草
與藤下士聞道笑不笑安足希愧我十年間冶
容效蛾眉挾瑟倚市門還爲識者嗤不待見君
後自悔應自知信已猶徇人往者誠難追

詠懷詩

居室苦不怡振策將遠遊跡往信緒風常與萍

藻浮久客計獨拙一身難自謀取酒會親暱
言還故丘名薄誼復單誰爲明所求飲酒竟長
夜終歲以優悠

過賈春孃墳

埋玉是何年拈金誰惜憐蒼苔沉履跡豔氣浮
墟烟粉黛宿已化羅衣塵暗牽骨消疑有態魂
怯不成妍芳心隱啼鳩幽恨咽哀蟬夜月空粧
鏡朝雲荒翠鈿露零愁曉日霜信颯秋天隕蕙
終離草寥音虛繞絃金盃安知處錦襪豈應傳

但是悲銷落能無獨黯然

解詭詩 有序

夫澧蘭沅菴江離澤杜爲君子所佩久矣故
漢有遊女志詠于詩章湘之夫人徵歌于騷
士巫神陳宋玉之賦則施鄭歛容江姝投交
甫之佩則簡珠失色夏姬三少則奔命兩卿
樊氏一言則蜚鳴莊霸楚妃色殊見篇工于
漢樂息媯情重每追賦于唐詩至如鄭袖之
解張儀怒者以怯園姝之夷黃歇智可使愚

居謫二集
古之人何于楚色甚也髯公才情絕世意氣
非常博愛有之至心應在旣遺北方之獨立
乃求南木以休思念有獨鍾神無更奪蝶戀
方深過花叢而暫息龍光不再當辰星以永
貞識荆玉于卞和足猶未惜置吳鉤于薜燭
城可易諸蓋周秦之間吳楚鄰也敵也然館
娃傾國寔以芋蘿中原競盟乃來齊女申公
通吳之年未聞忘夏子胥破楚之日猶處其
宮要離輕俠遂肯焚妻孫武軍師忍于戮豔

則吳人都不愛吳女何耶乃今不然矣余嘗
至吳而始醉心焉其弱情婉態信溫柔之卿
雅曲清譚真愛慾之海非烟非霧變態不常
乍陰乍陽超遙自往故常聞音而魄動望色
以魂驚耳而復有其人焉姑射之肌膚臨邛
之情隱曲寫秦青謔調髡朔一語之嬌可使
驍勇無氣半簾之面能令愚駿生巧翩乎矯
如不可尚矣髯郎旣與之私且以狎好而一
不置念其中有所主而不可化也壯哉母謂

楚無人焉殆不可以未見少之也蓋秦廬粵
鑄技有專工文菑屈芟人有偏嗜愛僂之指
不若已之指爲悅已容者乃爲知己者乎故
豫子三仕獨讐國士之遇廉頗入燕每思趙
人可用亦各言其志也已矣又何用相諛爲
遂作解諛詩二章

并前相諛者爲一帙

昔者子虛子詫客雲夢田今者長鬣公驕我楚
人妍妍亦何足驕其人人而天誼可卓孟齊德
與姬姜肩兩心爲一心心與心相憐衷契繇言
外意會在日先遂令平生戀獨注靡再牽桃李
非不華何如松栢堅慈石有本性寧與金錫連
時時來夢寐往往託詩篇我自多情人不欲聞
此言歸雲空際起因風想飄然

其二

日進不必御遙聞起相思試問聞聲日何如見
面時見面勝所聞我憐吳中兒曼容與嬌態信
乃天人姿白雲誠有鄉清風宛以期語笑出形
外中奧良獨知挑招非寄目愁喜豈屬眉趙璧

未足擬荆珩寧爲竒世人多耳觀不辨澠與淄
解妒旣已鮮解憐當阿誰髯郎妙情識一顧輕
相遺金石有時化膠漆無解携

過訪程民逸

重過黎陽道言問高士廬雙流纏回谷階溜承
清渠萬山歛蒼蔭千章樹扶疎密竹仍複林峭
峰互縈紆伏石苔粧淨衆壑冷音虛委巷寄深
密幽意盈庭除戶外來賓朋戶內羅詩書佳酒
壚頭至美饌摘園蔬脫巾亦解襪炎氛若爲祛
共坐漣漪上歡晤當何如

其二

世道日多變而今懷古心遊爲山水故而遺冠
與簪魑魅塞路衢相涉何必深入群寧無亂戰
腴誰其任智械尋禍機素絲恐易侵所聞盧龍
間忽來煩濁音與君駭復疑取酒坐竹林遠風
自南來聊以當我襟胡寧受結束如彼觸羅禽
往者不可諫猶可及來今

蝶裙詩題贈作者鮑翁

唐詩二集
卷三
十一
剪絲傳陳樹鍼絕夸魏宮鮑郎更高手巧製誰
能同百技靡不會刺繡尤獨工忽飄一群蝶攢
集翠裙中弱粉沁微露秀羽翩輕風簇鬚委嬌
蒂並超暝芳叢美人恣搖悅春心花暗通羅扇
誤相撲睡醒猶朦朧

其二

花嬌蝶亦嬌相逐春風時春殘花已謝見蝶憶
花枝憶花驚蝶在蝶在花生姿美人驕顏色如
花卽自知不見花間蝶在儂腰下垂花心寧信
改蝶戀永無移絲絲及時採絲絲不斷思胡不
趣嬌蝶來郎夢中期

其三

昔讀陳思賦又見滕王圖愛花因愛蝶如以屋
及烏屋上烏可惡花間蝶增趣屋裏啐烏啼裙
邊邀蝶聚點綴似疑真鮑郎誠可人爲花如借
魄與蝶是傳神不見鍼線痕但見舞紛紛輕羅
消受得翻摺幾氤氳

題畫盆中松爲梵可

松姿亭亭龍鱗鹿班蓋或摩雲根可絡山胡爲
乎茲結根在磐理旣內固形亦外完託玩几案
聊以盤桓豈無長幹匠石斯觀以偃蹇故得清
士歡大固有用小亦自安蕉石蘿竹同署異官
誰能貌此濤生壁寒昔師馬遠今號瞿曇

江上

客計時時左鄉心夜夜東無聊此孤涉有路不
知窮霜葉飲波溜霧樹連遙空江鬼晚泣炤天
吳晴作風習坎執逾邁重巽悲來同

庚寅四月十五日余墮其二齒時年三十
有二耳豈獨安仁二毛之感而已乎衰
徵見于盛年自無異人却老之術歲月
馳邁髮短心長以詩志之

常縱命老聃齒以剛見摧張侯視妻子舌在焉
用悲壯歲預衰端搖落相與期年往志不立童
心猶若茲三齡孰爲授二毛寧獨違我聞至人
言有形罔不虧內固豈益事憂生誠足蚩被服
飲美酒樂事終期願

代致景升

欲留不得留欲語不得語含情睇笑中相望密
相許中夜自沉吟知君歎有心南風歌驟競誰
爲感離音

贈陶周望公望昆仲

史局擅史筆仙署真仙人我未見仙人意君其
匹倫水壺湛清月哀玉憂修筠不必淆與澄萬
里無涯津愛山剔山骨畏酒奪酒神禪宗秘密
意海岸俱沉淪惟有新詩篇可以窺微因牙琴

海水間吾以喻其真

其二

有一必有二難弟卽難兄辯肆峻金礪文圍函
玉英韋弦何事佩茹吐皆忘情適意山水間涵
泳有餘清耶溪秀以潤稽山崢以嶸竹色旣猗
猗松姿何亭亭雲生石衣薄風蕩波鏡平伊人
相映發攝其靈與精列在晶瑩旁自覺穢我形
酒深舌端滑庶幾與合併

黃雨石使君同遊會稽志贈一首

居詩二集八詩
十五
淑顏如玉和清心比霜凜單車出國門持節來
東省傾蓋成故歡接論裏相引但見多情懷何
嘗留域畛驛餉彛常需官儀謝華整積案止青
緗隨查惟綠筍曠度旣以夷高言殆無隱共懺
山徑曉連床署中暝客子旣達流主人猶逸品
遂令狂散人不復能束謹豈辯冕與緇但知詭
與飲信宿聆緒譚旬朝恣酣寢涵意在泉石餘
夢寄衾枕魂宕耶溪流神爽稽山領越潮易却
回郊舟興俱盡閩天秋鴈外雲光時引領

溪行

山翠欲滴竹秀可餐石峭骨立波搖目寒篴如
駛箭楫行飛瀾接語不倦舌鋒筆端

武夷山

昔聞武夷山道是神仙境于今到始知猛然生
宿省迴勢合作環竒峰透如穎刺天或似矛拔
地或成筍象肖無不有命名惟所近如象亦如
虎如墨如粧鏡或如城與廊或如大小癩千狀
總難狀神工合神領我有山水癖游不出鄉井

記誌併畫圖每見每自哂獨茲附使查遊策庶
已整猶彼饑渴人一旦獲酣飲天遊興未移俞
兒尚余引

贈談嗣鎔東歸江陰時將北上

相知原在昔會面方自今故鄉懷宿約異地感
同心勞歌念行役取酒相酌斟時時來問訊一
似瑤華音作客半載餘秋氣日以深朝起理孤
裝振策還舊林余亦浪遊子歸程尚滯淫執手
一爲別待我江水陰

其二

岐路逢君處因之憶若翁豔曲時有變清尊日
不空膏光繼朝旭寒月轉春容遺度壯縣弧善
肖知良弓不歎傾父客居然有父風以茲豪舉
氣較飲燕市中縱轡黃金臺高譚碣石宮雙翮
亮已振雲天隨所從

別汪士能

歸懷良已促客游非宿心寒風振江樹芳歲亦
再陰去程猶濡滯前路多蕭森我友眷我密取

居言二集
詩
酒散煩襟時時來問遺嘉訊比兼金感此交誼
重揮手復沉吟人生百年內會短別易深逝波
臨驟驥歡緒何當尋渺渺碧江外因風想嗣音
登慈姥磯題石
曰余翼爾升於高危禽龍其梯佩流珥險而偃
足嘻疑久旅殉塗登望厥偕神耦智單時唯邁
而穴石自風遙波生衣淵鬼張魄怒雲駭顏心
之戚矣日月代賓惟我有懷流水盈盈謂我不
懷以天爲正

繇北山趨圓蹬

舍篋曲水湄整履高山岑疊崑崇嶄絕迴壑互
幽森精廬密搏霧祇樹鬱成林延眺曠以邈緣
磴崎且嶽旣已遵其陽又復陟其陰仄徑步屢
折懸嶂望彌深飛泉潤縞帶游氛界素襟繁花
點霞髻嘉竹韜雲簪何以表虛寂芳風蕩靈音
卽境良自適俛仰得我心返視塵中轍翹首以
沉吟

讀黃堯衢詩文

倡和圖盛業形模尋衰端嘉注惟大曆羶聚或
建安刻畫豈不工肖貌何足觀卓哉閩海士力
欲迴狂瀾凝神兼得髓會意斯忘言二酉無固
函三篋亦殘編中郎千卷隘鄴侯萬軸寒置身
周秦際託志曹劉間遂使澆季風緒接遂古前
振衣臨大道願言相勗旃

青蓮閣詩爲李季宣作

肯構新以麗曠望遙且清大江流作帶衆山如
相迎波容行几上黛姿緣檻生八牕臨眺外四

野居然平禾黍正油油禽鳥亦嚶嚶舉目有畫
圖况乃得所營文囿信間雅譚肆隨縱橫自足
寄遐賞良可違俗情蓮潔不待濯顧瞻此嘉名

其二

昔有謫仙人著詞逼清漢自號青蓮士深心游
汗漫君今乃苗裔後先相與煥詩句信比肩酒
或得其半崇構錫茲名興文鬱華粲林桂接軒
牖澤蘭依井幹承梁非弱荷充棟皆柔翰聚客
時復多修爵行無筭我自好飲者卜夜直至旦

補王康成去年生日詩有序

與康成先生交者二十餘年其意氣豪邁
風神爽朗託意詩酒之林忘情世俗之外當
梧譚飲鼓掌呼笑若燕市荆高竹林劉阮直
小豎子耳今年其春秋六十矣鬚髮上姑見
二星而飛揚之態揮灑之襟與二十年前無
以異也凡與同好俱爲詩壽之而先生亦自
喜徵樂召客歡讌竟日夕不知老之將至此
所謂能樂其生者乎故其生全王氏仙籍最
多然豈必服食飲氣耶卽此是矣蘇子瞻有
言無事靜坐日可當兩日活七十年卽百四
十若康成不憂生而樂之不勞生而逸之古
所謂與天爲徒者哉其壽庸有旣乎

月邁日斯征今歲又屬庚所以娛天年詩恒與
易盈達士允不勞無事求名聲得意形骸外閒
適少惕驚詩以道吾志酒以怡吾情枕上續新
句花間解宿醒無以役其神無以滑其精恣而
欲肆之吾聞之廣成心曠慮乃息物澹身自輕

卽此爲老彭卽此爲蓬瀛何必如王喬服食始
長生

答茅孝若


昔余游東路憇言茗水湄遲迴岐路間遂獲心
所知執手當中夜一言我酬思我思誠不越相
憫及同時寒霰爲朝解陰晷忽宵移聯轡無後
轍方舟有前期結交自古初斯世寧足遺深譚
未終夕忽忽歲月馳縈戀在心曲無已傷永離

其二

昔別在何時寒風凋枯楊鬱鬱茗溪道冰雪淹
舟航征旆不及馳契濶情未央茗宛一水間路
短心苦長此離無永旦良晤待春陽春陽曾幾
何草樹已再霜冥思阻愁鬱奔命日不遑寄訊
誠匪遙睽索寧可常引領東來雲託意俱飛揚

雙溪詩

智士有佳賞達人秉微觀蕩思空谷中在澗樂
考槃上善乃所喻稽水澄心顏流碧媚崎岫群
秀羅中湍雲氣屯魚鱗芳緒蒙荃蘭隨波何澹



P22-P23

淡澗潯激頽巖川勢鬱且竒靈風相紆盤虛鑿
臨遠矚清曠謝塵喧信哉新安水何必讓嚴灘
晉書龍谷詩
大郭何吼肆迴峰襲窈冥下有千仞谿連蜷獲
秘靈玄龍茲偃伏映帶絢辰星燭陰煥相炤雲
物絡爲纓潛姿互幽光見際當文明西周稱老
聃東海識管寧道在屈伸間濁游胡不清退則
保丹壑進則乘紫氛蜿蜒望朝谷振鱗從此升
題程康伯小像

渺渺江上雲藹藹長松林素秋標綺練中夏貯
寒陰逸峰延遠矚清籟發竒音怪石磊以礪幽
篁蕭且森游氛淨嘉秀景霧開陵岑誰能娛悅
此默坐理書琴狀貌儼殊衆服履匪自今接跡
綺與用玄髮賤華簪中契陶與阮尊酒佐高吟
豈不懷世賞結念良已深聊足理歲月寧復厭
沉淫間情遺巧械極目有遐心我亦戀丘壑相
對良所欽

贈王康成

客處誰可適頽然枯酒間誰與偕此好王君有
其緣過門輒相呼買酒對陳編醉後各自暢晤
歌竟忘言砌草不知秋取媚在亭軒瑟瑟蕉上
風刁刁竹中絃遙砧併近蟲寂坐愛微喧人生
總塗路勞役徒爲愆且藉片時息化愁聊作歡
金錢非上藥寧待美容顏

題蝶袱包雙豔詩

蝶亦爲周周亦爲蝶蝶耶周耶安生分別周亦
非周蝶亦非蝶夢耶覺耶當面不決

初至九鯉湖夜立一祭月水間

新月炤懸瀑金風響寒玉雙峽束湍激一潢粲
幽谷石勢矚流錯俯飲如蒲伏上澹盈且跳下
崖奔似蹴竒質澹倩容半鏡窺修目接雨噴千
絲騰雷轟萬軸人跡雖亦繁胡不礙幽獨信乃
神人宅居然遠塵俗

四溟看玉筋

躋險有三術惟仗膽與目步陟力不任頻以手
代足我來四溟遊其徑危更感上則百折蹊下

臨千仞谷兩趾遞相投梯空半援木行人累辟
易從者皆蔽觭境窮始見竒屏息聊與矚冷音
散攢金高溜雙垂玉怪石舐層崖縈波滲粒碌
鷄骨聳雲片虎眼軟巖麓旋湍不一瀦迴壑凡
幾復欲進路更絕嶄削壁尤秃悵望石門間令
人心逐逐

爲戚不磷

寄生在桑枝根蒂相結連何以嫵婉故各得心
所憐至意潛與通雙情良獨專裏契應自知至
信謝流言瑟琴和且謚膠漆猶共堅膠漆有解
攜茲期常不愆

二瀆觀瀑布

水勢連崖動山稜夾岸齊漂空疑曳練攢石似
磨笄引注隨科滿尋流逐處低亂洄還自搏下
峽欲相擠怒溢穿連臆環中蓄作臍臨風同漾
璧映日或成圭對酌情俱蕩窮源路未迷逝川
寧用歎仙境共留題

九瀆

九漈寔九折折折注神奇注流必盈盎盎濫流
方滋我未至五漈憶想乃得之咽石中自沸逢
坦忽見支夕炤淡中落朝爽雲際披流覽頓忘
莫遐想亦移時浣神惟挹露袂濁如引磁牡谷
豈獨雄玄牝非單雌且醉澄湖上夢醒應覺知

延津又用謝韻一首

羈客戀徒侶川嶽諧賞眺疊石溪勢絕奔流苦
騰峭船迳不容身仰矚少光曜已難任展側况
復尋歌嘯爲有筏前岸庶得尊中妙且逐世間
緣寧惜世外諠奚以張公劍不齒嚴陵釣去住
雖殊途烟霞想同調

將到延平再用謝韻

延浦本靈澤閩上多崇山碧流屯亂石乳竇濬
幽泉經過駭竒蹟弔古懷昔賢尋源時有徑阻
壁疑無阡夕嵐籠薄炤曉氣升層烟劍光久消
蝕龍化空餘筌鐵繡湧寒溜神物徒遺傳淵躍
豈不再函發何獨前不見九域金亦復澄潏潏
信貽神姦忌罔象胡得然

又和謝韻

水宿亦云倦山程可具論回谷風似裂頰流勢
若奔南方少落葉炎浦遺芳蓀洲次石千狀崑
際雲萬屯晨征望朝霽夜長愁夕昏暫息若爲
曙恍惚夢到門契濶聊用慰長少相與存展轉
還已覺流光熒旅魂霜月不知寒淡續無留溫
惟有弧矢義自壯應自敦

又用謝韻贈陳季迪

玄歲將啓青素衣久化緇朝卜旅處爰夜懷雨

雪詩多岐感揚路雜染悲墨絲客情寧更淹言
旋方在茲晨裝澹朝烟秋衣冒寒颶中心自熒
惑因子前致辭遠道相依託遲歸應有時千里
步陟間臨風隨所之但以歲年暮宿要違初期
中心指皎日曾何嫌與疑遡來且晤歆敘別亦
悽其三復白珪篇聊以明不欺

途中感懷用陶韻

閒性戀郊澤雅好惟詩書按瓶雖罄矣對酒常
自如何以歲年晏而在中路衢近與舟車密久

居諸二集八
與親戚疎歸念常自迫中夜懷縈紆去家千里
外作客半載餘與僕爲我徒傳舍爲我居可以
南飛鴻而無西上魚丈夫志四海寧爲鄉井拘
安時且隨遇匝月還吾廬

再用陶韻贈俞青父

我行二陰月歷途盡玄冥朋好敦世締山川愜
勝情出疆無載贄道路有班荆臨岐別昔歡同
舟得友生雲氛屏翠絡水月練光明浮陰庶已
汰川流猶未平星露厲晨發風霰引宵征擊楫
想共濟問津懷耦耕自期物外觀非慕世間榮
武夷信靈宅終以留吾名

諸洞

逼海峻巧鑿神工幾開斥陰壑擬固函匿徑似
疊裝立石奔礚研信乃巨靈擘龍怪自茲伏神
僊亮有宅磴絕得複蹊穿空抵危脊密蓋光全
沍翳然天一割懸竇臨四垂夾門森兩掖攀崖
頰崖顛搜山極山鬲茹首竟深眇及足累跋涉
宿苔微作班短樹小編幘溯歸忘故道記名藉

指畫嘉辰俟明發爲約重振策

贈林丹山郡伯

公昔爲縣日春風花滿林邑里多絃歌堂上有
鳴琴拂蓋惟祥雲隨車泣甘露視民允不怵持
法文無深樹德莫如滋積感猶至今時時頌麥
穗在在憩棠陰餘波隣化浹相思徽與音聞天
隨鴈到遂已獲所欽西歸遲明發岐路猶沉吟

其二

名園多暇日有客款竹扉疇是旅遊人舊服相
因依取酒來斟酌聊以慰渴饑芳塵接緒論朱
燈沉夜暉柔風宛以穆羽爵馳若飛客子歌鳧
鷺主人稱露晞故義存著簪高情屬緇衣爽籟
啓夕涼溫蔭歛寒威醉心連日久前路宜忘歸

酬答黃使君

客路共寒暑遊處暨朝昏海水微天候林樹侵
霜痕壑風森夜濤崑泉界雲根長宵攬生魄玄
旦隱晨暎久旅倦途役殘歲騰且奔豈必賦無
衣親交誼已敦分甘有餘味留飲無遺尊借譽

忘其泰前路思與存似此綈袍意尤勝挾纊溫
客程四改月與君相遙隨養病暫停轍先發復
何爲遊子戀故鄉東歸良有期且爾稍爲別初
念仍不移樂郊訪遺蹟及我故所知高誼一何
篤於往先導之輔以紀綱僕佐以輿酒貲賓至
乃有歸危路亦已夷自慙誠鄙薄何繇罄我私

林晉伯園亭

郊原棲息處曠望有深情山澤區以會結構閒
且清規池源溜淨疊石苔文生荔圃嘉蔭接蕉
徑森風鳴遙峰來遠翠近流漱微聲霜月澹碧
海暮烟噓寒城疎花搖水練澄霽開雲屏憑欄
一以眺心目迥與迎卽境已爲寂會意聊歎局
圖書信云樂栢酒猶可傾筆床倚爐直琴几對
山橫旣愜三益望寧慮四難併

上陳肅老尚書

周官兼教祀虞庭重秩宗典文和在宥論道陪
從容肇裡迄有成者定竣乃庸阿閣直雲上日

華相與融泰交用拔茹豐際宜亨中振鷺容旣
叶選驥群斯空輝景正當耀歛光謝塵踪霽氛
豈無術所好吾茲從是以夔龍曹而操箕穎風
曠望海嶠間真氣時溶溶

其二

濟世多遺策解組當盛時泉石良足娛疏滌或
成蹊蕭然三徑中花樹亦已滋至性遠煩濁雅
尚惟書詩芳風出雲壑翠華冒清池岑巘常振
策遐川猶汎漪梵宮啓先導神臯藉留題色借
崑谷曙憇跡卉木知心寄軒袞外思與羲皇期
蓬壺有鐫名豈歎鼎與彝

其三

白日麗中天亦復鑑重泉江海不讓流百谷斯
歸焉岡陵頌優德地山占鳴謙挹冲莫知盈飲
義如臨淵喬松俯寸莖受蔭良已駢仰止非一
朝投分誰見先眇眇生顏色瓦礫參璵璠循躬
誠鄙薄何以玷賓筵嘉酌旨且多寒燭引宵烟
侍坐無倦情起對每更端寧問日蚤莫中夜猶

流連

彭肇休讀書處

近在城西隅市囂胡遠驅清情蠲濁陰不待斷
軒車宛然四壁立中藏千歲書似茲丈室間恒
沙注有餘靈音響鈴鐸夜光藉尼珠妙相窺金
粟無言對文殊玄覽滋涓滌祛練存靈虛藝圃
崇翰藻墨池泳朱魚風幡任動搖中意常晏如
神默境亦寂誰能亮所儲

題贈趙靖原手

有序

夫贈處之義從來久矣故曰贈人以財不若
以言言出同心所以謂之如蘭也趙四丈翩
然國士筮起材官愿謹之中意氣尤倍鄭莊
之孤裝千里季布之一諾百金無以過之是
以慕之者氣求遇之者心醉譚若冰釋誼若
雲合戶外履常滿座上尊不空少長俱歡冕
褐並適于時流寓都門交接道廣凡在蘭金
之好各效嚶鳴之聲歌以永言集而成卷敬
將瓦缶以餌玉律耳

芳樹本迎蜜磁石能呼鉞山雲象草莽水氣兆
魚禽物感以其類合味且同音交誼豈不然達
士衆所欽仁風來廣譽夷度開煩襟賢門遺屨
錯如鳥集高林譚端驚座隅形外獲我心

其二

少小負竒策從仕遊燕雲羶鄉不記寒胡騎驅
爲群揮手五陵豪長揖大將軍弱冠歸鄉閭筆
視日耕耘力田不逢年更欲立竒勲結客滿城
內栢酒致慙勤試問謀與畫何論力與筋雲臺
比麟閣思不平與分世人惟耳觀誰能辯蕪薰
修翮待風舉夏月正南熏

聽琵琶詩贈劉一

樂伎有琵琶如農有耜耜出疆舍來耜弃田而
卽市末世多失職不獨女與士士失經不工女
失曲不理鴈柱沉五音賜絃澁十指舊部誰其
人遺聲尚在耳劉孃親授來妙撥循正始按宮
復按調清商變清徵肉絲仍叶和心手相應擬
一終尋始亂四座爲悲喜風中蟬吹合柳外鶯

啼似此枝久絕響艷歌徒靡靡聳然驟一聞空
谷將無是

留別應欽于于亭

作客四旬餘日日亭中居亭中何所有有琴復
有書群華時點綴竹樹亦蕭疎列石成崑洞繪
壁多禽魚月色浮砌動雲氣懸窓虛清賞延近
玩塵濁乃遠祛主人賢達人佳物性所儲修詞
尚雅逸繕性游太初雖與鬻市接迥若高士廬
久住戀林陰移徙將何如

其二

與君初相知歡然成舊交文翰馳永旦肴酒出
中宵海物陳必佳欸接日益饒賓至亦如歸舍
館清且寥玄言每傾坐雅望不待標適意山澤
間相和長短謹芳情常自接至性寔已超素風
生海隅落葉滿平臯久客思故鄉中心懷遠遙
岐路有前期繫維且終朝冥飛雲上鴈相望各
勞勞

其三

角弓存嘉樹統素贈班荆人生貴相知何必相
聞名聞名仍見面求友契嚶鳴取酒相與酌以
慰饑渴情寒濤有奔響秋竹留清聲桂樹曉氣
艷黃花晚節榮客久多所藉樽壘伴嚴更別懷
時轉轉前路愁獨征樹猶不忍別而况心所嬰
遠望浮雲飛搖搖如懸旌

荅江戶部

心期千古前識面苦不蚤江蘭與浦蕙一見成
美好適意杯酒間芳澤恃相保嘉言贈同聲一
似瓊枝草世路有嫌疑枳棘盈周道紹介紛相
索被服何綺縠亮君久識察庶以當懷抱

姑熟道中簡章元禮

昔來相與晤客久今復還歲月不須更道路有
阻艱近江風夜號怒濤立如山息肩此樂土入
境嬉且閒禾黍遍原疇流離俱已旋瘠民享豐
政汚潦遂膏年康哉賢主人爲德無頗偏願因
暇豫日用結平生言中意苟不瑕朽株猶自前
東歸別黃使君

從公昔于邁暑風吹客舟別公今東還寒氣侵
敝裘欲別不忍別欲留不得留踟蹰杯酒間道
路長悠悠

其二

悠悠路初長離情自茲始霜華零去津巖飈蕭
中泚憶昔見公時傾蓋成知己言言皆會心事
事俱相體

其三

體我緇素流而公簪與冠飛沉雖異勢乃作平

等觀適館授我餐解衣憐我寒分貲贍徒旅轉
轉心未安

其四

安然涉遠途頓忘行苦辛念家歲已逼顧懷心
所親雖在鄉井間而公猶一身去住各依依離
緒難重陳

其五

陳我心所思我思歎馳騖對面成今嚮分手卽
道路鷄鳴郵傳曙鴈影雲天暮巖風驚客帳夢

回關月度

其六

度山復度隴相望無已時連旬又連月何物不成思所可慰我懷爲有來歲期計欲約日短江臯秋桂滋

方伯書伯維讀書金粟園

園屋亦何麗湖水清且漣茂藻秋尚綠芳陰夜復妍夕秀振陽液朝華披晨烟菊露常滿砌桂月時下簾修鱗泳曲沼翻荇殊躍然好鳥鳴高

林臨風不辭喧逸響出新篁流光溯幽泉藹藹花萼標嚶鳴相與聯鴈鴻海天外接翼起高騫

其二

園中少氛務清曠生遠心構基旣虛寂卜徑亦蕭森垂簷俯近川列墉當遙岑密房可憇息高臺有登臨耕畚文藝田漁獵翰墨林倡酬在友於墳箎振和音邳桂匪獨授謝草必雙吟追隨日多暇負荷力固任歡然道疇昔躑躅撫來今

延津懷古

武庫昔焚時張公救火遲孔履與豐劍一逝永
無遺鐏鏤終自贈隴樹空爲期延津龍去后千
載有餘思

其二

函石肯終沒人間難復留魚腸曾有號龍化竟
何繇一合經千載雙飛到十洲寧輸楚都馬不
佩穎川牛

其三

此地旣龍潛吳丘亦虎變或爲腦後丸或作空
中練蛇精路何泣猿公術何玩信哉五行酋俱
能成靈幻

留別康元龍馬季聲王粹夫孫子長康季
鷹五首

會晤無幾時道路從此長悠悠雲水間倏忽成
異鄉南國梅已吐關外惟雪霜寒溫各殊候音
塵詎可量相對一尊酒臨岐不盡觴人生天地
間弧矢志四方願言終自勗共醉燕市傍

其二

八閩富華彥十子稱才人代興有群公大雅尤
獨振飭志經生問皇風起沉淪家家抱明月在
在生陽春迅飈逞健翮頽波抗逆鱗近調遂已
變古義良茲陳以我鄙薄姿自媿非匹倫相臨
大道側庶以啓迷津

其三

納交不必素岐路相因依愛客授盤飧譚讌情
不違惟有蘭與桂可以喻音徽彈結豈獨難與
子同裳衣前路悠且長當涉由我畿積心時冉

冉亦如常渴饑遙望海天外鴻鵠與奮飛

其四

還余適子館蕭然何曠朗露階積秀陰風徑流
清響秋竹漾寒月晨花媵朝爽圖書增逸情蹊
路少塵鞅受益良已泰少憇成心賞一別須臾
間相望詠河廣吳芳幾牽拈閩雲數來往

其五

寶劍合延津明珠生海湄信茲士藪澤所儲良
不貲花萼句中標林竹酒間期相求嚶以鳴相

和墳與箴蘭亭少勝韻鄴下有遺規遂令東南
方英風擅四陲別途悵修邁天際想來儀

歸思用陸士衡韻

朝行劍水陽夕宿劍水陰川途勢懸阻歸夢何
能尋游雲亦有卿倦鳥思集林貧處愁在昔悵
別還自今棲遲道路間白日又已陰前期旣難
豫後念仍復侵卽事寬所懷轉轉不可禁家食
懸遠望客久多畏心數離非一朝馳戀能無深
檢點到家近日莫想徽音

寄內用古韻

雪霰侑徒旅明月侵房帷相思各相望中夜獨
徘徊客處豈云易無夕不懷歸家居亦何迫促
行當爲誰出路本由路夏葛今寒衣

又用任昉韻

禾首尼父感出關老氏思至人不嬰物亦復愁
遠坻去來本任人胡爲難自持我爲山水遊歡
樂良在茲來亦何所求去亦何所悲閒雲蕩漾
間隨風以爲期炎方日旣寒遊子從此辭

尚書陳公招飲西巖
愛山同謝傳逸情似商皓寄興巖谷間開徑得
幽藐綴石盡竒峰引流注芳沼花露滴砌衢松
風鼓林杪陰洞時流光迴蹊自相遶與室連孤
嶼危樓在其表冥棲不厭深曠望復浩渺遙岑
如列屐懸海見收潦結念清且穆遊氛淨於掃
靜壑有奔響精廬無餘擾覽眺良已豐佳招辱
傾倒譚讌分宵光優沃享清醪高標映皎日乃
肯顧微小初筵賦湛露懷德歌旣飽

集虛齋詩爲黃使君作

構室委巷中遠與塵氛離雖復在城市喧囂相
避之何如人間世而有世外期竹風旣蕭森花
露亦已滋點砌多所諧綴石尤爲竒圖書連壁
潤琴劍繞榻垂抱虛良有宅練心裏獨知虛無
而因應老氏乃吾師丈室佇恒沙此義良可窺

報陳季迪

余爲閩中客閩土信云珍玄夜猶易旦終日乃
如春遙山有靈蹟近海多異鱗果樹列作園通

居詩二集
四十一
澗澮爲津岑峰何巖巖水石何磷磷我舟旣以
肄我車亦以巾清酒陳百壺可以涓埃塵

曉發用玄暉韻

疎裝惟一擔蒲帆亦幾兩曉發猶見星流月尚
微漭風引川峽閒光分陵脊上他鄉路漸遙故
國道應廣靈籟起朝音清波愜幽賞瞻雲望彌
長臨水意俱蕩客深懷念多將因謝塵鞅

寄黃應興使君用謝韻

同路適同心乃在異鄉縣游子駕言邁音塵屢

難見寒候違授衣客情寄搗練陽鳥鳴洲渚落
葉滿郊甸可以今日睽能忘昔時晏昔宴藉殘
暑今睽集維霰聚散會何期歲月倏已變

送朱在明光祿

高秋嚴氣至收潦江水清江水日夜流游子心
不寧積雨淹日晏歸風送潮平寒霖不爲澤芳
樹滋已零朝暾戒南發夕浦指東征顧瞻京國
間誰能無餘情感會旣須臾念別時屏營爲言
心所寤將以待春縈

臧晉叔子馬邀會于左府後堂賦得涼風
起天未分低字

祝融逝將邁大火復流西微颺漾清漢吹萬參
差齊煩襟庶云滌勝友相與携露冷荷響淨月
曙梧陰低幽懷感歲序芳思引蒲莢對此碧空
色蕭然望不迷

又用前韻一首

燭龍已歛炤迎郊方自西噫氣動蘋未比竹聲
淒淒虎嘯候始應商音扇未齊鳴陽鶯柳暗咽
露蟬枝低開襟宥喧濁立韻不可稽但惜衆芳
歇因之感離睽

題康伯竹房

層軒縈蜜構崇蘭締弱阿維石旣巖巖綠竹亦
猗猗淇園接清蔭慈母分翠柯素月流皓影微
風澹曾波勁姿媚修幕幽籟起雲和夏榻凝寒
液冬霰積竒葩秋聲蟬噪寂春篠鶯啼多朝光
披窈窕夕氣緼貞嘉孰此愛閒逸終歲知婆娑
庶無俗士韻信乃碩人邁

曹能始招集雞鳴山同柳承父臧晉叔陳
惟秦魏穎超陳延之王曰常汪肇邵僧
孤松子馬顧所建

春日氣和淑嘉招萃名流俯觀臨川澤登頓適
陵丘微烟帶遙岫輕風拂近洲青林澹如洗紫
草艷若浮四難旣已併兩美具相求修爵及無
筭高言庶與酬如此休暇日畢歲以優游

送郭太乙陵烏兄弟還泰和以清曠招遠

風爲韻

入門通片刺自昔已聞聲忽復聆玄論夷度淑
且清世濟知其美日可見之行卽堪賦伐木何
必待班荆

其二

澄江如練淨夏雲點青嶂映炤一水間桂楫時
相蕩取酒酌芳洲胷次俱爲曠僊舟擅一姓李
氏寧增悵

其三

雙蜚原並翮逸氣本凌霄三蘇眉山俊二方陳

氏翹旣已和鶴陰且復附鳳蕭乃今同璧乘寧
俟應弓招

其四

芒芒都邑中奕奕文章苑相逐芳與香何論琰
與琬胡爲儵然來胡爲儵然返惠好亮不移芳
風庶無遠

其五

章水引竒穎武山標峻叢地靈固已勝文事何
其雄嚶鳴約茲會契濶胡遽逢庶幾西上魚來

音寄歸風

贈程道南

昔者阮步兵世故感其情但以眼爲舌聊復酒
爲名言之或無罪六義我所賡可群亦可怨仲
尼刪作經理炤似非炤遺生乃得生至今詠懷
詩託喻猶難明而茲窮巷士想像追遺聲遭世
苦不融憂患相與嬰險阻備已嘗世態習且更
何以將自慰頌詩譎微誠何以將自食授徒作
代耕有憤姑爾發不平能自鳴遂與竹林人異

代而合并三復鵲鴿篇至今猶屏營

其二

結交在人世而多貧士緣豈無袞冕流末終恐
不全象恭自結束修容費折旋言或非其衷片
語尋殃愆更有二五輩如蟻而附羶媚顏匠心
招依人託鳥憐何必非珠璧朽株亦得前所以
高世資適志在林泉握手無禮數貽贈匪金錢
締思形骸外語笑亦澹然草蔬當肉食吟詠代
軒懸幽蘭任馱芳素質有餘妍誰識段干廬誰

知毛薛賢同人于野亨吾茲信易古

采真詩爲馬季超四丈作

靈境豈殊域玉羅含虛真衆妙攝玄牝不死惟
谷神因應仍有常逆數契無垠綴宅非我宅遺
身乃得身何物在身外大千籥微塵幻人誤幻
機抱塊弃奇珍達士秉達見捨筏已忘津

其二

八絃亦有極九垓亦有止想超遺近遠神驚無
終始紫天安知外絳闕安知裏密遊踵息間潛

關復誰啓呼吸成古今毫末卽萬里瓦礫至道
存離中溼積水

其三

蓬壺無定寓勾漏焉得丹圖經與硯石凡上列
名山熊鳥何足效性靈胡外攀大藥本在握芝
木爲草管坐卧隨飛舉安用假羽翰自寶旣自
迷解識剎那間壯或真士遊吾已知其還

其四

馬君儒碩流難與俗儒伍家居近南極思作北
溟舉遊目隘大荒邁跡半區宇六氣亮可騎三
曜時吞吐五嶽五卷石不足盈步武十洲十泡
漚相去能幾許汗漫如可期雲氛奚間阻有涯
御無涯問之養生主

麻姑仙壇詩爲祝夫人壽

仙品非凡品靈境自靈棲麻姑曾有壇千仞俯
清谿遺蹟宅玄秀地勝徵名基昔蹤標九垓今
樂在中閨山鏡懸深碧天牖披虹霓錦文帶蟬
綏金策印龍泥絳雲共黃闥東炤隨青藜氏同

姬姜貴至德能日躋道非梁龐倫逸性乃與齊
珈服豈直借衮職亦云裨一心期皓首接跡凌
丹梯
送劉元定還楚以清曠招遠風爲韻
邂逅有良契締結非世情眷言敦我素風尚穆
以清聞聲馳遙憶求友感嚶鳴蘭桂非一樹芳
香乃所并吳楚豈異域離思胡爲生

其二

泃泃江上峰夏雲相與蕩別懷孰爲裁客子時
騁望南荆遐且邁東流渺哉曠歸燕滯晚風來
鴻迷曉嶂誰可將余意游鱗或西上

其三

楚風翩逸氣峽水界高標姿度覺已別神穎本
自超世氛何足涓雲路不待招誰謂巢許倫而
在金與貂我作塵外想因君期久要

其四

相逢朱雀橋宿懷一爲展持論寧憚深當梧不
辭涵寒波臨汎多春岫勝遊選和歌隨高下願

情無近遠鳩舌彫芳草別念不可剪

其五

登樓思暇日送遠操歸風欲寄流水曲郢江潮
不通湛湛千里外其上惟有楓永旦望難極歸
雲時來同賓朋漸蕭索誰與慰途窮

送方嗣宗兄弟是時嗣宗入陳超宗入吳

林宗入蜀

歲莫日已寒天風鳴枯桑兄弟兩三人相去各
一方身在千里外悲喜誰爲將本是墳與篋胡

爲參與商對面不成別置酒此中堂彈箏發哀
響烹鮮煮肥羊觴至飲未終僕夫在道傷寒鵲
東南飛孤鳥西北翔

賦得閩雲連越邊送曹能始

娥江邈東度嵇水迅南征眺迥塵外境蹊作雲
中行峭從天上落波向日邊明是流皆噴激無
石不磴洵懸注百尋隘古木千章橫吟猿夜燈
寂潛蛟洞液清回渚環怪嶼危峯接丹城展圖
思已爽入夢能無驚壯遊愜歸念僊路非俗程

我欲往從之世故多相嬰安得乘羽翰名嶽附
題名

其二

昔余閩中遊時在秋冬間水至川溜噎嵐次峰
勢環湧石壺吐漏倚天劍作山叢碧如負宸層
翠似結鬟過嶺憑雲度下峽隨徑彎騰龍儼踞
與卧虎蹲當關跳湍溯灘駛輕舸椽岸板蕩目
及林麓漱神臨潺湲况茲乘越嶠台鴈又靈寰
瀑布晴雨譎霞標陰華殷相思清夢逸寤寐從

君還

汪二魯家招會觀奕

物觀棊一物棊觀物盡棊賓筵廢壺射雅坐起
沉思對壘几案上折衝尊俎時結陣如有方合
圍良應期縱敵未易測攻堅不厭竒邊裔或左
次中區或暗窺無寧病掩擊何繇慙巧遲靜聽
落子聲遙占整舊機一局猶未竟羽爵紛已馳
此技本兵象弄兵何如斯奕酒自足樂兵道誠
多危

靈谷寺

日出窮登頓冥搜得茲域結構抗林杪陰崖絕
人跡灌木湛秋陰雲霞歛暝色萬松抱迴山絕
棧積危石水鳴入解池月隱四禪室麋鹿亦可
侶蘭苔屢堪摘撫化無倦情塵慮俱已息持塵
問支公玄言坐終夕

居諸二集卷三終

